


MGA HEBREOHANON,

KAPITULO DOS ³

 Sa ika-7, ika-8, ika-9, ika-10 nga kapitulo, gikan dinha, oh, pagkanindot! Mao nga iandam n'yo na, ang inyong lapis ug papel, ug tanan na, kay nagatoo ko nga hatagan gyud kita sa Ginoo og halangdon nga higayon. Karon atong . . .

²¹⁸ Ginabayaw ug ginapahimutang ni Pablo, sumala sa hustong pagkapuwesto, si Ginoong Jesus. Karon, kung mahuman nato kini karong gabhiona, nan sa Dominggo sa buntag . . . Nga ang dakung bahin niini may kahilambigitan mismo sa Mensahe sa Dominggo sa buntag, tungod kay mahitungod man kini sa “pagpahimulag sa sabbath.” Usa kana ka dakung pangutana sa mga Sabadista karong panahona. Ug ginadapit ko kamong tanan nga motambong sa Dominggo sa buntag. Tungod kay, unsa ba gyud ang husto, Sabado o Dominggo, ang adlaw sa pagsimba? Unsa ba'y ginaingon sa Biblia mahitungod niini? Ug busa, kon ang . . . Ginabulag sa niining Basahon ang kasugoan ug grasya, ug ginapahimutang pud Niini ang matag usa ngadto sa ilang pagkapuwesto. Ang mga Hebreohanon kaniadto namatuto man sa kasugoan, ug mao nga gisultihan sila ni Pablo kung unsa ang gibuhat sa grasya, sa kasugoan.

²¹⁹ Bueno, karon mokuha lang tà og diyutay'ng basihanan. Mobalik sa kita.

²²⁰ Lain pa'y ato, gidala diay nako ang antipara ko nga pangbasa. Tingali'g mahimo kong . . . Kung mahitabo man nga masayup ko sa—sa pagbasa karong gabhiona, nan magamit ko kini. Kabalo mo ako'y . . . duha ka tuig na lang ang kulang para mag-singkwenta'y anyos na ako, ug dili na gani ako makakita sama kaniadto, pag anaa sa duol nako. Kaniadto ang akong panan-aw . . . hinay-hinay kong namatikdan nga nagakahalap na ang mga pulong, abi gud nako og mabuta na ako. Mao nga miadto ako para magpaeksamin. Ang ingon sa doktor, “Dili. Milagpas lang gyud ka og kuwarenta, anak.” Bueno, ingon siya, kung mabuhi ako sa igong katigulangon, mahimo kono nga mabalik ra kini pag-usab, mabalik ra ang akong panan-aw sa duol. Ingon siya, “Karon, mabasa pa ba nimo ang imong Biblia kung ginapahilayo mo kini sa imoha?”

²²¹ Ingon ko, “Oo.”

²²² Miingon, “Pero dili magdugay, mokunhod na man ang imong buktion.”

²²³ Ug busa ako—nagalaum ako karon, sa niini nga pagtuon, nga ako . . . Kining gamay'ng Biblia nga Collins dagku man ang

mga letra niini. Mao nga mabasa ra nako kini og ayo. Pero pag modangat na kita sa mahinungdanon, og halawom nga mga bahin kon diin kinahanglan natong hisgotan ang Bag-o ug Daang Tugon, ug itakdo kini. Aduna pud ko'y gamay'ng Scofield. Ug naanad na ako sa Scofield nga Biblia, sa mga marka niini. Pero dili ko na ginabasa ang mga sinulat ni Scofield, tungod kay dili man ko uyon kang Scofield mahitungod sa daghan niyang—niyang mga teorya. Apan ako—gusto ko gayud ang pagkahan-ay niini, tungod kini'y . . . anaa kini sa akoa sa dugay na nga panahon, ug nabasa na kini, og ayo, hangtud nga medyo kabalo na gyud ko kung unsaon pagpangita ang akong hilisgotanan.

²²⁴ Ngani bag-o gayud kini para sa ako, ang pagtudlo, ug dili man gud ko ingon nga usa gyud ka magtutudlo. Mao nga, pasensyahi lang sa ko ninyo sulod sa hamubo nga oras, og isulti ko kaninyo ang Kamatuoran kutob sa akong nahibaloan Niini, bisan pa man.

²²⁵ Bueno, gisulat ni Pablo kini nga Basahon, mahinumduman man ninyo, siya'y . . . Unsa man ang atong nasayran mahitungod kaniya? Usa siya ka bantugan nga magtutudlo, sa sugod pa lang, o usa ka bantugan nga eskolar. Ug binansay siya kaniadto sa Daang Tugon. Aduna ba'y makasulti sa ako karon kung kinsa ang nahibaloan nato nga magtutudlo niya? [Nagaingon ang kongregasyon, “Gamaliel.”—Ed.] Si Gamaliel, nga usa sa mga inila nga magtutudlo niadtong panahona.

²²⁶ Ug usab si Pablo, nahibaloan nato, usa niadto ka adlaw . . . Sa wala pa siya gitawag og *Pablo*, aduna ba'y makasulti sa ako kung unsa ang iyang ngalan kaniadto? [Nagaingon ang kongregasyon, “Saulo.”—Ed.] Saulo. Ug usa siya ka may dakung pagbulot-an sa Jerusalem, may pagbulot-an sa relihiyon. Ug nahimo siyang usa—usa ka binansay gayud, og rehiliyoso nga tawo. Makasulti pud siya og upat o lima ka nagkalainlaing pinulongan, ug usa siya ka maantigo kaayo nga tawo. Bueno, pero nakatabang ba sa iyaha ang iyang edukasyon ug pagka-maantigo? Wala. Ngani miingon siya nga kinahanglan pa niyang hikalimtan ang tanan niyang nahibaloan, aron nga maila si Cristo.

²²⁷ Busa atong nahibaloan, kung ingon-ana, nga dili diay gikinahanglan ang usa ka maantigo nga tawo o usa ka edukado nga tawo. Kondili ang gikinahanglan ang usa—usa ka tawo nga andam ipaubos ang iyang kaugalingon sa atubangan sa Dios, bisan unsa pa man.

²²⁸ Nasayod ba mo nga si Dwight Moody kaniadto usa—usa ka wala gayu'y edukasyon nga, sa tinuod lang, ang iyang mga sinulat dili gyud maayo nga daw sa dili nako masabtan kung unsa. Gikinahanglan pa gani nilang han-ayon ang iyang mga

mensahe, kanunay. Siya—siya’y usa gayud ka dili maayo nga manunulat, og walay edukasyon.

²²⁹ Nasayod ba mo nga si Pedro ug si Juan, sa Biblia, mga wala pud gayu’y nakat-onan nga dili gani sila makasulat sa kaugalingon nilang ngalan, ug dili gani makahibalo bisan pa kung ipahimutang ang ilang ngalan diha sa atubangan nila? Si Apostol Pedro, nga adunay mga yawi sa Gingharian, dili gani makahibalo nga ang iyang ngalan na ang anaa gisulat diha sa atubangan niya. Hunahunaa n’yo kana. Miingon ang Biblia, nga, “Siya’y walay-hibangkaagan ug walay-nakat-onan.” Busa, nagahatag gyud kana kanako og kahigayonan. Amen. Oo, sir. Nagakahitabo kana, para ipakita nga mahimo gyud kana sa Dios nganha sa usa ka tawo.

²³⁰ Karon, ug nahibaloan pud nato, sa dihadiha nga nagkaaduna si Pablo og usa ka mahimayaon nga kasinatian. . . Gusto kong mangutana kaninyo. Usa ba ka kasinatian ang pagduol kang Cristo? Ang tanan aduna ba’y kasinatian? Oo, sir. Oo, sir. Usa kini ka Pagkahimugso. Usa kini ka kasinatian. Ug bueno atua kami sa usa ka Lutheran College, dili pa lang dugay. . .

²³¹ Nagkaaduna ako og pribilihiyo kaganinang hapon, naulahi pa gani ako, kinahanglan man unta nga atua na ko didto pagka-alas dose, para sa paniudto kauban—kauban si Tom Haire. Pila ba sa inyo ang nakadungog na mahitungod kaniya, ang ilado, nga Irish, nga mainampoon kaayo? Ug nakauban niya kining si Igsoong Epp, sa iyang programa, ug nakawali na sa daghang lugar dinhi sa Amerika. Ug naniudto ako kauban siya karong adlawa. Ug kami’y. . . Naulahi gyud ko og mga tulo ka oras. Mga alas tres-traynta na kadto, kinse minutos na lang para mag-alas kuwatro, sa dihang nakapangaon kami. Pero okey ra hinoon. Ug naghisgotanay kami bahin sa ingon niining mga butang, bahin sa kung unsa nga si Jesus Cristo mao ang Ulo sa tanang mga butang.

²³² Bueno, sa dihang nasayran kini ni Pablo, nagkaaduna siya og kasinatian. Ug dayon adisir siya miuyon niini nga kasinatian, gikinahanglan nga nahiuyon úna kini sa Biblia. Ug nahibaloan nato nga siya—nga milakaw siya ug miadto sa laing nasud, ug nagpabilin siya didto sulod sa tulo ka tuig, nga ginasusi ang Kasulatan, aron hibaloan kung husto ba ang iyang kasinatian.

²³³ Karon, nahibaloan pud nato nga adunay dakung butang ang gikinahanglan niyang atubangon kaniadto. Gikinahanglan niyang mobalik ug sultihan ang iyang iglesia, ang tanang katawohan, nga tinuod diay ang mismong mga butang nga iyang ginalutos.

²³⁴ Nakasinati na ba mo og ingon niana nga aduna kamo’y butang nga gikinahanglan buhaton? Sigurado, halos tanan gyud, kinahanglan n’yong mobalik ug moingon, “Sila nga mga tawo nga atong gibansagan og ‘mga holy roller,’ hingsayran ko nga,

husto man diay sila.” Kita n’yo? Ingon niana. Gikinahanglan natong mobalik. Ug ang mga butang nga kaniadto atong gidumtan, ginahigugma na nato karon. Usa kini ka pagbag-o, usa ka talagsaon nga butang, nga lahi.

²³⁵ Karon, nahimo ko kanang pahayag, nga “holy-roller.” Wala ma’y ingon-anang butang. Wala gyu’y ingon-anang butang. Apan, ginatawag nila ang mga tawo og ingon-ana, mga tawong holiness kono. Pero wala baya’y mga holy-roller. Wala gyu’y ingon-anang butang. Walay rekord sa unsa mang iglesia nga narehistro nga ingon niana, kutob sa akong nahibaluan, nga sobra siyam ka gatus ug saisenta, nga nagkalinlaing mga denominasyon. Walay ingon-anang denominasyon nga holy-roller. Tungod nga usa—usa man gud kana ka ngalan nga ginabansag lang sa yawa nganha sa Iglesia.

²³⁶ Pero ilang gibansagan sila, niadtong panahona. . . Pila man ang nahibalo kung unsa ang gibansag nila sa ilaha niadtong panahon ni Pablo? Mga erehes. Nahibalo ba mo kung unsay buut ipasabot sa *erehes*? “Buang-buang.” Mga tawong buang-buang. Busa, dili magdugay bansagan sàb ako nga usa ka “holy-roller” ingon nga usa ka “erehes.” Dili ba? Pero kung sila—kung sila kaniadto bansagan og ingon-ana, mangalipay man hinoon sila!

Ug unsa gani ang gisulti ni Jesus nga atong buhaton bahin niana? Miingon Siya, “Managmaya, ug managkalipay kamo; kay daku ang inyong balus didto sa Langit, kay sa ingon man niini gilutos ang mga propeta nga nanghiuna kaninyo.” Gibuhat nila kana.

²³⁷ Ang ingon, “Managkalipay sa hilabihan gayud.” Ang unsa man nga *hilabihan* mao’y “hataas gayud,” nagakalipay gayud. Ug ang mga tinun-an, kaniadtong hikaplagnan sila nga takus sa pagpas-an sa kaulawan tungod sa Ngalan ni Jesus, nanagmaya sila nga may dakung kalipay ingon nga mahimo na nilang pas-anon ang kaulawan tungod sa Iyang Ngalan.

²³⁸ Ug karong panahona, daghang mga tawo sa karon, nga kung mahitabo man gani nga bansagan sila ingon nga usa ka holy-roller, manalaw man hinoon sila, “Hala! Basin lagi og sayup ako, sa sugod pa lang.”

Apan malipayon man sila kaniadto tungod niini, “Oh, pagkanindot, nga pas-anon ang maong Ngalan!”

²³⁹ Ug kaniadto, sa ikaduhang gatusan ka tuig, ilang gibansagan sila ingon nga *mga nagapas-on og krus*. Mao kadto ang panahon nga nagapas-an og krus diha sa ilang likod ang mga Cristohanon kaniadto, aron ipakita nga gilansang sila sa krus kauban ni Cristo. Mao nga gibansagan sila nga *mga nagapas-an og krus*. Karon kabalo ko nga ginatawag sa mga Katoliko ang ilang mga kaugalingon nga ingon niana, apan dili man iglesiang Katoliko kadto. Kondili iglesiang Protestante kadto sa wala pa kini gitawag nga iglesiang Protestante. Wala kini’y unsa man

nga giprotestahan gawas lamang sa sala. Ang hinungdan nga gitawag pud kini ug iglesiang Protestante sa karong panahon tungod kay nagprotesta man kini sa—sa dogma sa Katoliko. Pero usa kini. . .Kini, niadtong panahona, dili pa kini sekta, kaniadtong ginabansagan pa sila nga *mga nagapas-an og krus*.

²⁴⁰ Basaha lang ninyo ang kasaysayan ni Josephus ug sa uban pa nga mga manunulat, ug ang *Two Babylons* ni Hislop, ug uban pa, ug mahibaloan ninyo nga husto kana, nga dili sila kaniadto unsa man nga iglesia. Ang unang iglesia nga naorganisa, sukad, mao ang iglesiang Katoliko, mga tulo ka gatus ka tuig, human sa—sa pinakaulahi sa mga apostoles. Mga tulo ka gatus ka tuig human niadto, naorganisa ang iglesiang Katoliko. Ug misugod ang pagpanglutos, ug gipuwersa ang mga tawo nga magpamiyembro sa iglesiang Katoliko, ug ang iglesia ug estado, ilang gihiusa.

²⁴¹ Nahitabo kana human sa, pagkakabig kono, ni Constantine, gikan sa paganismo paingon sa Katolisismo. Apan, kung aduna man sa inyo ang nakabasa na sa iyang kasaysayan, wala man gyud siya nakabig, tungod sa mga butang nga gipangbuhat niya. Oh, my! Ngani ang butang lamang nga nahimo niya nga may kahilambigitan sa relihiyon mao ang ipahimutang ang krus sa ibabaw sa simbahang Santa Sophia. Mao lang kana ang butang nga iyang nahimo, ingon nga pang-relihiyon nga buluhaton. Siya’y dili—dili mapuslan alang sa bisan unsang maayong bulohaton. Pero gitawag nila kadto nga iyang—iyang pagkakabig kono. Halos sama ra gayud sa kung unsang ginatawag nga mga pagkakabig sa karong panahon.

²⁴² Karon, apan, nahibaloan nato, nga sa pagkakabig ni Pablo kaniadto ug nagkaaduna niining tinuod nga kasinatian, siya’y bug-os gayud nga miliso.

Ug, kabalo mo, ang *pagkakabig* nagakahulogan og “pagliso.” Nagapaingon ka sa *niini* nga direksyon, ug moliso ka ug mobalik sa *niini* nga direksyon. Oo, sir. Usa ka pagliso, pagbiyo.

²⁴³ Ug si Pablo, sa pagkakabig niya, adisir niya mahimong pamatud-an ang iyang kasinatian. . . Bueno, nagkaaduna siya og usa ka kahibulongang kasinatian.

Karon, nagatoo ko, nga pag dawaton mo si Cristo, ingon nga imong personal nga Manluluwas, usa na kana ka kasinatian. Nagatoo ko, nga ang kalipay nga masayran mong gipasaylo na ang imong sala, bug-os gayud, nga makapalipay sa imong kasingkasing.

²⁴⁴ Apan pag mokunsad na ang mapanalanginong Balaang Espiritu, usa gyud kana ka kasinatian, kanang bag-ong Pagkahimugso, nga dili mo mahikalimtan. Mamahimo ka na nga Anak sa Dios. Ug ania ang nagabuhat niini. . .

“Unsaon mo man pagkahibalo, Igsoong Branham?”

245 Karon, mga leksyon man kini para sa pagtudlo. Daghang, mga Methodist, ang nagaingon, “Nakasinggit sila sa dihang naangkon nila Kini.” Bueno, maayo man kana. Kung naangkon mo Kini, ug nakasinggit ka, maayo. Pero tungod lang kay nakasinggit ka, dili man kana ilhanan nga naangkon mo Kini, tungod daghan man ang nanagsinggit pero wala nakadawat Niini.

246 Ang ingon pud sa mga Pentecostal, “Nakasulti sila og laing mga pinulongan. Naangkon na nila Kini.” Maayo gihapon kana. Kung nakasulti ka og laing mga pinulongan, ug naangkon Kini, maayo. Apan mamahimo man kang makasulti og laing mga pinulongan ug wala sa gihapon makadawat Niini. Busa?

247 Busa, nakita n’yo, bisan pa nianang tanan, ang mahinungdanon mao gyud kining kasinatian mahitungod sa pagkabalhin gikan sa kamatayon ngadto sa Kinabuhì; pag namatay na ang tanang mga daang butang, ug ang tanang mga butang mamahimo na nga bag-o. Si Cristo mamahimo na nga tinuod. Mangawagtang na ang mga daang butang, ang mga daang gamut sa pagka-karnal. Kabalo ba mo kung unsaon pag-ibot ang usa ka gamut? Nagagamit kami kaniadto og guna nga pangkalot ug kaloton kini, ug ibton kini hangtud nga wala na’y bisan usa ka tipik niini ang mahibilin. Ug ingon sila, “Kung adunay unsa man nga gamut sa kapaitan nga mogitib kanimo, larota kini dayon.” Husto kana. Ug ingon niana ang ginabuhat sa Balaang Espiritu, laroton ang tanang mga gamut. Kaloton ang mga niini. Ipangtapok kini; og sunogon ang mga niini. Puohon kini. Kung ingon-niana makaani gyud ka og maanindot nga ani, kung atong buhaton kana.

248 Bueno, nasayod si Pablo kaniadto nga aduna gyu’y nahitabo, busa miadto siya sa Arabia, ug didto gitun-an niya sulod sa tulo ka tuig ang mahitungod sa tanang mga propeta sa Daang Tugon, kung sa unsang paagi sila nanagpropesiya. Ug nasayran niya nga Kadto mao gayud ang bug-os nga Kamatuoran.

249 Karon, itandi nato kana sa karong panahon, kita n’yo, sa niining kasinatian nga atong naangkon dinhi niining gamay’ng simbahan: ang bahin sa Bitoon sa Kabuntagon nga nagpakita didto, kadtong dakung Kahayag nga mikunsad, nga nagapanagna ug nagapakita og mga butang nga mahitabo. Kabalo mo, kahibulongan gyud kadto. Apan gisultihan ako sa igsoon kong ministro nga iya kono kadto sa yawa. Ug ako—wala ko pa man mahisabti kadto.

250 Busa, wala sa ko’y unsa man nga gisulti mahitungod niadto hangtud nga usa ka gabii, adunay usa ka kasinatian nga nahitabo didto sa Green’s Mill, Indiana, sa dihang milakaw didto ang Manulonda sa Ginoo ug mitindog didto, ug gipamatud-an kadto pinaagi sa Kasulatan. Dayon nagdilaab kadto. Pagkahuman hinay-hinay kadto nga nagakawala.

²⁵¹ Ug niadtong miaging Domingo, nasaksihan gyud nato ang dili-masayup nga mga ilhanan ni Jesus Cristo, Kinsang may kasarang nga ayohon ang usa ka tawo nga dili makalakaw, ug dili...Nawala na gani ang iyang ugat nga para sa panghinimbang, og sa dihang miingon ang mga taga Mayos ug ang mga pinakamaayong doktor, “Wala na gyud kini, hangtud sa hangtud.” Ug nagalingkod siya dinha nga buta; pero mitindog siya ug milakaw pagawas sa bilding, nga ginatulod na ang iyang wheel chair panaug sa hagdanan, tungod makalakaw na man siya ug makakita na nga sama ni kinsa man. Nagapakita lang nga ang gahum gyud kadto sa nabanhaw nga Ginoong Jesus. Mao kana. Siya mao sa gihapon kagahapon, karon, ug hangtud sa kahangturan.

²⁵² Busa dili ba kita usa ka malipayon nga pundok karong gabhiona, nga masayran nga gipanghimatud-an sa Dios kining mahimayaong kasinatian nga atong naangkon, nga nagatukma sa Iyang Biblia ug sa mga saad? Busa angay gyud kita nga managkalipay sa hilabihan gayud. Ug naamgo nato, nga diha sa ika-2 nga kapitulo, atong nahibaloan, “Kinahanglan dili nato pasagdan kining mga butanga...Kinahanglan dili nato talikdan kining mga butanga.” Kinahanglan kuptan gayud nato kining mga butanga.

*Ug unsaon man nato sa pagpakaikyas, kung talikdan
tà ang ingon kadaku nga kaluwasan; . . .*

²⁵³ Unsa kaha’y atong buhaton, sa kahayag sa Pulong sa Dios, pag motindog na kita didto sa Korte sa Paghukom? Dili ka puedeng moingon, “Wala gayud ako nasayod.” Oh, oo, nasayod ka baya. “Bueno, karon, tingali’g nasayup ra si Igsoong Branham.” Tinuod kana. Apan dili man masayup ang Dios. Dili sayup ang Iyang Pulong. Ug hunahunaa lang ninyo, ang mao rang butang, ang Biblia, nga nabuhi kaniadto sulod sa mga apostoles, nabuhi pag-usab sa karon. Oh, dalaygon ang Ngalan sa Ginoo!

²⁵⁴ Pag mahunahuna ko nga kuwarenta’y-otso anyos na ako, nga hapit nang magsingkwenta, ug milabay na ang mga adlaw sa akong pagkabatan-on, ug uban pa; pero ang mahibaloan nga sukad niadtong usa pa ako ka batan-ong lalaki naangkon ko na kining mapanalanginong Saad, ug napahayag Kini ngadto sa mga igsoon kong lalaki ug mga igsoong babaye; ug ang makita ang literal nga linibo ka mga tawo nga napahigawas gikan sa kangitngit, og ang mahibaloan nga paingon na kita sa atong Eternal nga Puloy-anan, sa mga bulahan. “Ug kung kining yutan-on nga tabernakulo matun-as man,” sa dili pa ako mahuman sa pagwali, “aduna na’y usa nga nagahulat kanato.” Alleluyah! Ang mahibaloan nga adunay dinosena nga mga tawo nga ania dinhi, nga, kung mobiya na sila niining kinabuhia karon, sa dili pa nato madala ang ilang lawas ngadto sa embalsamador, mamaatua na sila nianang

mahimayaon nga lawas didto, nga nanagkalipay uban ang mga balaan sa Dios, nga atua na sa Presensiya sa Dios, aron mabuhi hangtud sa kahangturan. Nga may hingpit, og bug-os nga kapanghimatuoran nga mamaingon-niana gyud kini! Amen.

²⁵⁵ Oh, makasinggit gyud niana ang mga Presbyterian! Sama sa nahitabo niadtong Domingo, dili ba? Mga Presbyterian man kadto sila. Siguradong makasinggit gayud, pag mahunahuna kana. Oh, dili ikatingala nga nagaka-emosyonal ang mga tawo! Aba, kung maukyab ka man gani gumikan sa pagbunal og bola o pag-itsa niana sa basket, unsa pa kaha nga mamahimo kang emosyonal kon masayran mong mibalhin ka na gikan sa kamatayon ngadto sa Kinabuhi, nga usa ka na ka bag-ong Binuhat diha kang Cristo! Mahibaloan man ninyo kana sa paagi nga ginapahilayo kamo sa inyong espiritu gikan sa pagkamadinauton, ug pagkamalimbongon, ug pagdumot, ug sa tanang mga butang nga iya sa kalibutan. Ug ang inyong kasingkasing pabilin gyud nga nakasentro diha kang Cristo. Mao kana ang inyong tumong. Mao lang kana ang ginahunahuna n'yo diha sa inyong hunahuna, diha sa inyong kasingkasing, sa tibuok adlaw ug gabii. Mao nga sa paghigda na ninyo inig kagabii, ug unlanan n'yo ang inyong mga kamot, nga nakaingon *niini*, ug mohigda dinha ug ginadayeg n'yo Siya hangtud nga mahikatulog kamo. Pagmata n'yo, inig kabuntag, ginadayeg n'yo gihapon Siya. Amen. Oh, pagkanindot!

²⁵⁶ Ginapaningkamotan ko usab nga dayegon Siya. Ngani inig kabuntag, pagmobangon na kami sa mga alas kuwatro, kami ni Igsoong Wood, manggawas man kami sa sayo sa buntag, aron mangayam og squirrel. Ginadayeg ko gayud Siya ilalum sa matag kahoy, sa hunahuna ko, nga akong maadtoan. Walay kahoy nga akong makita, nga dili ko Siya madayeg dinha. Palandunga n'yo, Siya baya ang nagpatubo nianang kahoy. Pag makakita mo og usa ka gamay'ng apan-apan nga nagalupad-lupad; nasayod Siya niana nga apan-apan. "Oh," moingon mo, "binuang, Igsoong Bill." Oh, dili, dili gyud. Nasayod Siya kon diin na ang matag squirrel. Nasayod pud Siya kon diin na ang matag alibangbang.

²⁵⁷ Aba, usa niadto ka higayon, nagkinahanglan Siya og kuwarta, ug miingon Siya, "Pedro, adunay usa ka isda, kaganina, nga nakalamoy og sensilyo, nga igo lang gayud, sa kantidad nga atong gikinahanglan. Lakaw ug itambog ang taga. Paadtoon ko kini didto. Kuhaa kadtong sensilyo gikan sa baba niini, tungod kay dili man niya magamit kadto, sa iyang kaugalingon. Lakaw ug ibayad na ang atong ikapulo ug buhis." Amen.

²⁵⁸ Ug pipila na ka semana ang milabay, nakita ko ang usa ka gamay'ng isda nga namatay, og nagalutaw-lutaw na sa tubig. Nadungog na man ninyong tanan ang estorya mahitungod niini. Anaa man dinha si Igsoong Wood, ug ang iyang igsoon ug ania sila nga makapamatuod niini. Namatay na kadtong gamay'ng

isda sulod sa tunga sa oras, didto sa tubig, nga migawas na ang mga tinai niini sa baba niini. Ug mikunsad ang gamhanang Balaang Espiritu, human nga miingon Siya, usa ka adlaw sa wala pa kadto, “Makita mo ang pagkabanhaw sa usa ka gamay’ng hayop.” Ug pagkasunod buntag, human nga misubang ang adlaw, nakita namo kadtong gamay’g isda, nga dili mosobra sa *ingon-niini* ang kataas. Sa diha nga mikunsad ang Espiritu sa Ginoo, ug miingon, “Gamay’ng isda, giayo ka na ni Jesus Cristo.” Ug kadtong patay nga isda, nga nagalutaw-lutaw na sa ibabaw sa tubig sulod sa halos tunga sa oras, nabuhi gayud ug milangoy palayo sa ingon ka paspas nga mahimo niini. Oh, dalaygon ang Ngalan sa Ginoo. Pagkamakahibulongan gayud Niya!

²⁵⁹ Dili ikatingala nga nakaingon si Pablo, nga, “Siya’y sumala sa laray ni Melquisedec.” Siya mao si Melquisedec. “Si Melquisedec walay sinugdanan sa mga adlaw. Wala Siya’y katapusan sa mga tuig. Wala Siya’y sinugdanan sa kinabuhi o katapusan man sa kinabuhi. Wala Siya’y amahan ni inahan.” Busa, Siya wala na gyu’y lain pa. Kung si kinsa man Siya, Siya’y buhi gihapon hangtud karong gabhiona. Busa, aduna lamang og usa ka matang sa Kinabuhing Walay Katapusan, ug iya kana sa Dios.

²⁶⁰ Niadtong miaging gabii sa dihang naghisgotanay kami, may usa ka igsoong lalaki ang wala makasabot sa trinidad sa Dios, ug nag-istoryahanay kami bahin naidto. Kung unsa nga mitindog kaniadto si Jesus, ingon nga usa ka Lalaki, nga mga traynta anyos ang pangidaron. Ug miingon Siya . . .

Miingon sila, “Oh, ang among mga ginikanan nanagpangaon man og manna didto sa kamingawan.”

²⁶¹ Miingon Siya, “Ug sila, ang matag usa kanila, nangamatay.” Apan miingon Siya, “Ako mao ang Tinapay sa Kinabuhi nga nagagikan sa Dios sa Langit, nga ginakaon sa usa ka tawo ug dili mamatay.”

²⁶² “Oh,” ingon sila, “ang among mga ginikanan nanag-inom man pud gikan sa Bato didto sa kamingawan.”

²⁶³ Miingon Siya, “Ako mao Kadtong Bato.” Usa ka Lalaki nga traynta anyos ang pangidaron. Miingon, “Si Abraham nalipay nga makakita sa Akong adlaw.”

²⁶⁴ “Aba,” miingon, “karon ang buut Mo bang isulti kanako nga kaedad Mo si Abraham, ug wala Ka pa man gani’y singkwenta anyos, ug buut Mo bang isulti nga nakita Mo na si Abraham nga walo ka gatus ka tuig na nga namatay? Kung ingon-ana nasayod kami nga adunay yawa Kanimo. Buang-buang diay Ka.” Mao kana ang . . . Mao kana ang buut ipasabot sa *yawa*, “tawong buang-buang.” Miingon, “Adunay yawa Kanimo, ug buang-buang Ka.”

²⁶⁵ Miingon Siya, “Sa wala pa si Abraham, MAO NA AKO.”

²⁶⁶ Siya Mao kadto. Dili Siya yano ra nga tawo, dili usab Siya usa ka propeta lang. Siya mao ang Dios, ang Dios nga nagapuyo sa ibabaw sa yuta diha sa lawas nga unod nga gitawag og “Jesus,” ang—ang nagpakatawo nga Anak sa Dios. Ingon Niana Siya kaniadto.

²⁶⁷ Karon, makita nato Siya dinhi, sa ulahing bahin karon, sa katapusan sa ika-2 nga kapitulo, nga buut kong hisgotan, sugod sa ika-16 nga bersekulo, o sa ika-15 nga bersekulo.

Ug giluwag sila...nga tungod sa kahadlok sa kamatayon—sa kamatayon nailalum sa pagkaulipon sulod sa tibuok nilang kinabuhi.

Mao kana ang iyang gisulti nga gibuhay ni Jesus, nga mianhi Siya aron luwason sila gikan sa pagkaulipon, sila nga nangahadlok sa kamatayon sa tibuok nilang kinabuhi.

²⁶⁸ Bueno dili man ta kinahanglan nga mahadlok sa kamatayon. Karon, siyempre, mahadlok gihapon kita; kita, wala man sa ato ang nagatinguha, sa ginatawag nato nga, *mamatay*. Apan kabalo ba mo nga kung natawo na pag-usab ang usa ka tawo dili na siya mahimong *mamatay*? Unsaon man niya pagpakabaton og Kinabuhing Walay Katapusan ug pagkahuman *mamatay* ra diay? Dili kana mamahimo. Ang bugtong butang nga kamatayon, ang pulong nga *kamatayon*, nagakahulogan og “ang pagkahimulag.” Karon mahimulag siya gikan sa atubangan sa atong mata. Apan anaa na siya kanunay sa Presensiya sa Dios, ug kanunay na gyud nga mamaanaa dinha. Busa, ang kamatayon dili malisud nga butang. Ang kamatayon usa gani ka mahimayaong butang. Ang kamatayon man ang nagadala kanato diha sa Presensiya sa Dios.

²⁶⁹ Pero karon, siyempre, kita, ingon nga tawo ra, nga nagalakaw dinhi niining mangitngit nga mga elemento, dili nato—nato masabtan kini sa paagi nga kinahanglan unta natong masabtan. Ug, siyempre, pag nagaabot na ang nagatuok nga mga kasakit sa kamatayon, nagakahadlok gihapon bisan pa ang pinaka balaan kanato ug nagaatras. Nakaingon man gani ang Anak sa Dios, “Mahimo ba nga isaylo lang kining copa?” Makalilisang man gud kini nga butang. Dili unta sayup ang pagsabot n’yo niini. Tungod kay kita . . . Kini man gud ang bayad sa sala, ang kamatayon, ug siguradong makalilisang gyud kini.

Apan kung makita lang nato ang luyo sa tabil, dinha, dinha kini mahikaplagan. Dalagyon ang Ginoo! Luyo sa tabil, dinha gayud nagatinguha ang tawo nga makatan-aw karong gabhiona. Ngani pirmi mang ginaawit nila Anna Mae Snelling ang usa ka awit dinhi, “Ginoo, Tugoti Akong Makita Ang Luyo Sa Tabil sa Panahon.” Ginatinguha gyud sa tanan nga makita kana.

²⁷⁰ Karon, bueno dinhi na kita, sa ika-16 nga bersekulo. “Kay sa pagkatinuod Siya nagahatag . . .”

Kay sa pagkatinuod wala niya gigamit ang porma, nga iya sa mga manulonda; kondili nahimo siya sa porma sa kaliwat ni Abraham.

²⁷¹ Oh, mohunong sa kita dinha karon. Bueno paingon na kita aron hisgotan. . . Tungod kay, ang unang bahin niining ika-3 nga kapitulo, og ang ulahing bahin niini, nagakatakdo man sa “nianang adlaw para sa sabbath,” nga atong hisgotan sa niining moabot nga Dominggo.

²⁷² Karon matikdi n’yo.

. . . wala niya gigamit ang . . . porma nga iya sa mga manulonda; . . .

Karon, si kinsa ba ang “Siya,” nga iyang ginahisgotan? Si Cristo. Si kinsa man si Cristo? Ang Dios, ang Logos sa Dios.

²⁷³ Karon isaysay ko kini pag-usab, aron makasigurado gyud kamo. Ang Dios dili man tulo ka Dios. Ang trinidad sa Dios Usa ra. Ang Amahan, Anak, Espiritu Santo, wala man nagapasabot nga adunay tulo ka managlahi nga Dios. Kung ingon-ana man, nan mamahimo kitang mga pagano. Mao kana’y hinungdan nga wala makasabot ang mga Judio. Wala man gud kini gikatudlo sa Biblia. Karon, ginatudlo kini sa iglesiang Katoliko, tinuod gayud, og dinha naggikan ang tutulo ka pagbautismo.

²⁷⁴ Didto sa Africa bautismohan ka nila sa tulo ka higayon nga pinaatubang: sa makausa para sa Dios nga Amahan; sa makausa para sa Dios nga Anak; sa makausa na pud para sa Dios nga Espiritu Santo. Karon, sayup man kana. Wala ma’y ingon nianang mga pagtudlo bahin niana diha sa Biblia. Kita n’yo?

²⁷⁵ Ug karon, mao kana—kana ang gikatudlo nila. Anaa na kana kang Luther; gikan kang Luther, mipaingon kang Wesley; og nagpadayon kana hangtud ngadto sa mga kapanahonan. Pero dili gayud kana usa ka pagtudlo sa Biblia. Sayup na kana sa una pa, sukad niadtong gisugdan kana.

²⁷⁶ Karon, ingon nga, ang Dios atua na sa sinugdanan. Sa wala pa magkaaduna og unsa man nga kahayag, sa wala pa man magkaaduna og atom, sa wala pa magkaaduna og bitoon, sa wala pa magkaaduna og unsa mang butang nga makita, gipuno na sa Dios ang tibuok kawanangan. Ug walay unsa man nga atua Didto kondili kaputli lang: putli nga gugma, putli nga pagkabalaan, putli nga pagkamatarung. Kadto mao ang Espiritu. Gilangkoban Niya ang tibuok kawanangan gikan sa tibuok Eternidad, kon diin wala kita’y kasarang nga matugkad Kini. Kini’y labaw pa sa unsa mang butang nga mahunahuna nato.

²⁷⁷ Sama nianang teleskopyo, makita nato pinaagi niana ang usa—usa ka gatus ug minilyon nga tuig sa light space. Hunahunaa n’yo kana. Usa ka gatus ka milyon nga tuig sa light space. Ug ang kahayag—ang kahayag nagabiyahe man sa gilay-

on nga mga walo ka libo ka milya matag segundo. Ug ang usa ka gatus ug minilyon ka tuig sa light space. . . Hunahunaa lang ninyo kung pila ka minilyon ka milya ang ginabiyaha niana. Dili gani ninyo maihap kana. Ipananglitan na lang ninyo ang usa ka laray sa tinag-nuebe ug ipadagan kana sa tibuok Jeffersonville, ug sa gihapon dili n'yo mahimong kalkulahan kana nga minilya-milya. Hunahuna n'yo kana. Ug sa pikas nga bahin niana aduna pa ma'y mga bitoon ug mga planeta. Ug ang Dios, sa wala pa man magkaaduna og usa sa mga niana, Siya mao na. Kita n'yo?

²⁷⁸ Ug karon ang Logos nga migula gikan sa Dios, nga mao ang—ang Logos mismo, misugod kini nga naporma diha sa usa—usa ka pormang lawas. Ug kini nga pormang lawas, sumala sa pagtudlo sa mga eskolar, gitawag nga Logos, ang Logos nga migula gikan sa Dios. Sa laing pagkasulti, ang usa—usa ka mas maayo nga pulong para niini, mao ang ginatawag natong theophany. (Ang theophany mao ang usa ka gihimaya nga lawas sa tawo.) Dili ingon nga may unod ug dugo nga sama sa gihimaya nga kahintang niini, kondili usa kini ka porma sa lawas sa tawo nga dili nagakaon, dili usab kini nagainom, apan kini'y—usa kini ka lawas, usa ka lawas nga nagahulat kanato sa dihadiha nga mobiya na kita niining lawasa. Bueno, dinha, kita mosulod niana nga lawas. Ug ingon niana nga matang ang lawas sa Dios, kay Siya miingon man, “Buhaton nato ang tawo diha sa atong kaugalingong dagway ug diha sa atong porma.”

²⁷⁹ Bueno, kaniadtong ang tawo naporma sa ingon niana nga lawas, aduna siya'y pagkontrolar sa tanang mga isda, ug mga langgam, ug—ug sa mga mananap sa kapatagan. “Ug kaniadto wala pa'y tawo nga magatikad sa yuta,” Genesis 2. Gibuhat na Niya kaniadto ang lalaki ug babaye, pero wala pa'y tawo nga magatikad sa yuta.

Dayon gibuhat sa Dios ang tawo gikan sa abog sa yuta. Iyang gihatagan siya ug kamot nga sama sa usa—sama sa usa ka chimpanzee. Iyang gihatagan siya ug tiil nga sama sa usa ka oso. Iyang gihatagan siya, Iyang gibuhat siya, diha sa maong dagway. Ug kini nga yutan-ong lawas sumala kini diha sa dagway sa kahayopan, ug gigama kini gikan sa mao ra mismo nga materyal. Ang inyong lawas gigama kana gikan sa mao ra mismo nga materyal nga sama sa kabayo, o sa iro, o unsa man nga sama niana. Naglangkob kini og calcium, potash, petrolyo, og cosmic light. Dili kamo. . . Ang tanang ingon nianang unod dili managsama nga unod; managlahi kini nga unod, pero gigama kini gikan sa abog sa yuta kon diin kini naggikan.

Mao nga, ang kalahian tali sa usa ka hayop ug sa usa ka tawo, nagbutang ang Dios og usa ka kalag diha sa usa ka tawo, ug wala Niya kini gibutang diha sa hayop. Tungod kay, ang kalag nga anaa sa tawo mao man kadtong theophany.

Oh, ako—ako, basin dili ko na mahisgotan ang . . .kini nga leksyon, pero kinahanglan kong mahisgotan gyud kini.

280 Matikdi. Nahinumduman ba ninyo kaniadtong gibilanggo si Pedro, ug miabot ang Manulonda sa Ginoo ug giablihan ang mga pultahan?

281 Misulod man gud kami sa supermarket dinhi, niadtong miaging adlaw, ug naabli ang pultahan sa atubangan namo. Ingon ko, “Kabalo mo, ang Biblia baya ang una nga nagkaaduna og ingon niana.” Kita n’yo? Bueno, ang maong, pultahan, maabli ra man mismo.

282 Ug sa dihang migawas na si Pedro, gilabyan ra niya kadtong mga tigbantay, tungod gibutahan man sila aron dili siya makita. Gilabyan ra niya ang tigbantay sa sulod, ang tigbantay sa gawas, pagawas ngadto sa nataran, og milusot sa bungbong, pagawas sa kalsada. Ug wala ni usa kanila ang nakaila kung kinsa siya. Ug wala gyud nanumbaling. . . Abi ra nila og siya’y usa pa ka tigbantay o ingon-niana. Sila. . . Milabay lang siya, ug naabli ra mismo ang pultahan, sa paggawas niya, ug nasirado ra pud. Ug sa dihang nakagawas na siya didto, abi niya og nagadamgo ra siya. Ug miadto siya ngadto sa balay ni Juan Marcos, kon diin sila nagpahigayon og panagtigum sa pag-ampo. Ug nanuktok siya. . . [Ginatuktok ni Igsoong Branham ang pulpito. Blangko nga bahin sa teyp—Ed.] . . . aron makauban kamo.

283 Oh, mahimayaon Siya. Kahibulongan Siya.

Karon, oh, *siya* wala gibuhat diha sa porma sa usa ka manulonda; *kondili gigamit niya ang porma . . . nga iya sa kaliwat ni Abraham*. Ang Dios nahimo nga *kaliwat ni Abraham*.

284 Karon, kung aduna pa unta kita’y oras, para balikan ug ipakita kung giunsa Niya pagbuhat kini sa Pakigsaad! Nadungog na man ko ninyong nagwali mahitungod niini, sa makadaghan nang higayon, kung giunsa niya pagkuha kadtong mga hayop ug gitunga kadto, ug gilakip ang tokmo ug kuyabog nga salampati. Dayon mitan-aw siya, ug namatikdan niya ang diyutay’ng aso, makahahadlok nga kangitngit, kamatayon. Sunod, usa ka hudno nga nagaaso, impiyerno. Apan, sa pikas nga bahin niana, adunay gamay’ng puti nga Kahayag. Ug kadtong gamay’ng puti mipaingon tali sa matag bahin niadtong gitunga nga halad, nga ginapakita kung unsay Iyang pagabuhaton. Ug nanumpa Siya, kaniadtong gibuhat Niya kadto, ug misulat Siya og usa ka Pakigsaad, ginapakita kung unsay Iyang pagabuhaton.

285 Ug Siya, si Jesus Cristo, mianhi sa yuta; ang Dios, *Emmanuel*, “Ang Dios diha sa unod.” Ug didto sa Kalbaryo, natunga Siya. Ug ang Iyang Espiritu mibalik sa Iglesia. Ug gipakayab ang Iyang lawas ug milingkod sa Trono sa Dios.

Ang Trono sa Dios! Ang Usa nga atua sa Trono mao man ang Maghuhukom. Nasayod kita niana. Bueno, asa ba ang Paghukom? Gihatag sa Amahan. . . Dili Siya nagahukom sa kinsa man nga tawo. Kondili gitugyan sa Amahan ngadto sa Anak ang tanang paghukom. Busa ingon niana Siya. Ug ang Iyang Kinabuhi mao ang Labaw'ng Sacerdote, nga nagalingkod didto ingon nga ang Kaugalingon Niyang lawas, nahimong usa ka halad, aron nga ipangamuyo ang atong mga pagsugid. Amen. Igsoon, aduna gyud kana'y ginapahimutang sa sulod ninyo.

²⁸⁶ Himatikdi, “Nahimo Siya sa porma nga Kaliwat ni Abraham.” Siya'y nahimong usa ka Tawo. Ang Dios, nahimong unod sa taliwala nato, aron tuboson kita. Sa laing pagkasulti, ang Dios nahimong sala, aron kita nga mga makasasala mahimong umalambit Kaniya. Ug sa diha nga moambit kita Kaniya, nagaambit pud kita sa Iyang. . . Mga tawo kita nga napailalum sa panahon, kan-uman ug napulo. Ug mikanaug ang Dios ug nahimong usa sa ato, kan-uman ug napulo, sulod sa Iyang gigahin nga panahon, aron nga makaambit kita sa Iyang Kinabuhing Walay Katapusan. Ug sa dihang matawo na kita pag-usab, mga anak nga lalaki ug mga anak nga babaye na kita sa Dios, ug aduna na'y Kinabuhing Walay Katapusan, ug dili gayud mamatay.

Oh, pagka—pagka—pagkamapanalanginon gayud nga Manluluwas! Oh, wala gyu'y paagi para maisulat kini. Wala gyu'y paagi para maisaysay kini. Kini'y lagpas pa gayud sa mahimong isaysay. Walay si kinsa man ang makasaysay kung unsa Kini kagamhanan. “Pagkagamhanan Mo! Pagkagamhanan Mo!” tinuod gayud.

Busa kinahanglan siya mahimong sama sa Iyang mga igsoon sa tanang mga butang, . . . (Palandunga n'yo kana.) . . . aron mahimo siyang maloloy-on ug matinumanon nga labaw'ng sacerdote sa mga butang nga mahitungod sa Dios, . . . (Paminawa n'yo kini.) . . . aron sa paghimo og halad sa pagpasig-uli . . . sa sala sa katawohan.

Aron sa pagpasig-uli, karon, ang Dios, nga nasayod sa pagkamatarung, gikinahanglan nga mahimong dili-matarung, aron nga mabati kung unsa ang mamahimong susama sa usa ka makasasala, aron mahibalik og mapasig-uli, pinaagi sa “pagpasig-uli,” ug malooy sa mga tawo.

²⁸⁷ Ang sunod nga bersekulo, paminawa n'yo Kini dinhi.

Kay niana siya sa iyang kaugalingon nag-antus . . .

²⁸⁸ Ang Dios dili man mahimo nga mag-antus diha sa Espiritu. Mao nga gikinahanglan Niya nga mahimong unod, aron nga mabati ang pag-antus sa sakit, aron nga mabati ang panulay sa pagpangibog, aron nga mabati ang panulay sa pagtinguha, aron nga mabati ang panulay sa pagkagutom, aron nga mabati

ang gahum sa kamatayon. Aron nga Iyang angkonon Mismo ang pagbarug sa Presensiya sa gamhanang Espiritu nga Jehovah, ang Espiritu, dili kadtong Tawo; kondili ang Espiritu mismo, aron sa pagpangaliya para niini nga kinabuhi. Ug giangkong kana ni Jesus, aron sa pagpangaliya alang kanato, kay nasayod man Siya kung unsay atong ginabati. Ngani pag aduna kamo'y sakit, nasayod Siya kung unsay inyong ginabati. Pag matintal kamo, nasayod gyud Siya kung unsay inyong ginabati.

²⁸⁹ Bueno, namatikdan ba ninyo pag nagabotar kita og presidente, ang matag mag-uuma mobotar gyud sa usa ka presidente nga nahimong usa ka mag-uuma kaniadto, kay nasayod man kini sa kalisud sa kinabuhi sa mag-uuma. Kita n'yo? Gusto niya ang usa ka tawo nga nakasabot.

²⁹⁰ Ug adisir makasabot ang Dios (Siya nga mao ang halangdong Pagkabalaan, unsaon man Niya sa pagsabot human nga Iyang gihukman ang tawo? Pinaagi sa Iyang pagkabalaan, Iya mang gihukman ang tawo.), ug ang bugtong paagi nga mapamatarung Niya ang tawo mao ang mahimong tawo.

²⁹¹ Ug gilandongan sa Dios ang ulay ug naghimugso kini og usa ka lawas, dili nga dugong Judio, dili pud dugong Gentil, kondili Iya Mismong Dugo. Dugo nga gilalang sa Dios, dili pinaagi sa pagpakighilawas, dili gayud, wala gyud kadto'y pangibog tungod sa pakighilawas. Ug kini nga Selula sa Dugo, nga gilalang sulod sa tagoangkan sa maong babaye, ang nagpahimugso sa Anak. Ug kaniadtong gibautismohan Siya ni Juan Bautista, miingon si Juan, "Ako nagapamatuod, nga nakita ko ang Espiritu sa Dios (sama sa usa ka salampati) nga mikunsad ug mihunong sa ibabaw Niya."

²⁹² Dili ikatingala nga miingon si Jesus, nga, "Ang tanang kagahum sa Langit ug yuta gikahatag na nganhi sa Akong kamot." Ang Dios ug ang tawo nahimo nang Usa. Ang mga langit ug yuta naghinangopay na, ug Siya lamang Mao ang makahimo og pagpasig-uli para sa atong sala. Mao kana'y hinungdan nga, sa Iyang Ngalan, nagakahitabo gyud ang kaayohan. Nasayod man Siya sa inyong pag-antus.

²⁹³ Nadungog n'yo na ba kining hamubong karaan nga awit?

Hingsayran ni Jesus ang pag-antus nga ginabati mo, makaluwas Siya ug makapang-ayo Siya;

Ngadto sa Ginoo dalha ang kabug-aton mo ug biyai kini didto.

Husto kana. Nasayod gyud Siya.

Pag ang atong lawas ginapaantus tungod sa kasakit, ug ang atong maayong panglawas malisud nang mabalik,

Hinumdumi lang nga may Dios sa Langit nga nagatubag og pag-ampo,

Hingsayran ni Jesus ang pag-antus nga ginabati mo, makaluwas Siya ug makapang-ayo Siya;
Basta ngadto sa Ginoo dalha ang kabug-aton mo ug biyai kini didto.

²⁹⁴ Mao lang man kana ang Iyang ginahangyo, “Biyai lang kini didto.” Ngano man? Siya man mao ang atong Labaw’ng Sacerdote nga nagatindog dinhi, nga nasayod kung unsay ginabati ninyo. Ug nasayod gayud Siya kung unsaon kamong ipasig-uli pabalik sa grasya, ug kung unsaon kamong ipahibalik sa inyong maayong panglawas. Hingsayran Niya ang tanan mahitungod niini, tungod nag-antus man Siya. Kaniadtong wala kamo’y ni usa ka luna nga mapatongan sa inyong ulo, mao man usab ang nasinati Niya. Sa diha nga usa ra ka bisti ang inyong pangpuli, mao man usab ang nasinati Niya. Sa diha nga ginabiaybiay kamo, og ginalutos, Iya usab kana nasinati.

²⁹⁵ Karon paminawa n’yo ang ulahing bersekulo. Sige.

...makahimo siya sa pagtabang niadtong mga ginatintal.

O, sa laing pagkasulti, may kasarang Siya nga *luwason* sila, nga *tabangan* sila, og nga himoon sila...nga *malooy* kanila. Tungod kay, ang Dios Mismo nahimo man nga tawo, aron nga mabati kini.

²⁹⁶ Mahinumduman man ninyo, niadtong miaging gabii, dili ba nagtudlo kita mahitungod niana? Kung unsa nga gikinahanglan sa Dios nga...Adunay ikot ang kamatayon, aduna kini og panghadlok. “Sa tibuok nilang kinabuhi anaa sila sa pagkaulipon sa niini nga *kamatayon*.” Ug dayon miabot si Jesus, aron Iyang tangtangon kadtong ikot gikan sa kamatayon.

Ug kaniadtong nagatungas Siya sa bukid, mahinumduman n’yo ba kung giunsa nato paghulagway kadto? Kadtong gagmay’ng marka sa dugo nga anaa sa Iyang kupo, wala magdugay ang tanan niadtong nahimo nang usa ka dakung marka, ug nagapisik ang Dugo sa tibuok Niyang lawas. Ang Iyang gamay’ng, mahuyang nga lawas, wala na Siya’y kasarang nga ipadayon pa, ug nahagba Siya. Si Simon Cyrene, kadtong itum nga tawo, ang mitabang Kaniya sa pagpas-an sa krus paingon sa bungtod.

Ug kaniadtong gilansang na nila Siya sa krus, ug misinggit Siya para mangayo og tubig. Ang si kinsa mang tawo nga nagadugo magkinahanglan gyud og tubig.

²⁹⁷ Mahinumduman n’yo ba sa dihang nagwali ako niadtong miaging gabii mahitungod “Sa lagsaw, ang laking-lagsaw nga nagakauhaw sa tubig sa sapa, mao usab ang akong kalag nangandoy sa pagpangita Kanimo, Oh Dios”? Kung samdan ang lagsaw ug buhi pa, pero nagakawad-an na og dugo,

kinahanglan gyud niini nga makaadto sa tubig kay kon dili nan mamatay kini.

²⁹⁸ Napusilan ako kaniadto, didto sa umahan, kaniadtong katorse anyos pa ako. Ug nagbuy-od na ako didto. Nabuthan man ang akong mga bitiis, nga mora na'g ginaling nga karne, gumikan sa 12 nga ripleng shotgun. Ug misinggit ako para mangayo og tubig, "Oh, hatagi n'yo ako og mainom!" Naminhod na gud ko niadto; naminhod na ang akong mga ngabil.

²⁹⁹ Midagan dayon ang akong higala ngadto sa usa ka dugay na nga lim-aw, nga aduna na og tanang matang sa gagmay'ng waya-way, og lapok. Pero wala ko na gipanumbaling kung unsa man kadto. Ug gipuno niya'g tubig ang iyang kalo, ug giabli ko ang akong baba, ug gipuga niya ang iyang kalo nga nakaingon *niini*, sa akong baba. Oo, gikinahanglan ko gayud nga makainom og tubig.

³⁰⁰ Nagdugo Siya kaniadto. Miiingon Siya, "Hatagi n'yo Ako og mainom." Ug gihatagan nila Siya og suka nga anaa sa espongha, ug Iya kadtong gibalibaran, ug gidid-an kadto. Siya mao ang Cordero sa Dios nga namatay puli kanato, aron maghatud og pagpasig-uli ngadto sa tawo. Unsa man kadto? Ang Dios sa Langit.

³⁰¹ Miingon kaniadto si Billy Sunday, nga, "Ang matag sapinit adunay mga Manulonda, nga nagaingon, 'Ituyhod lang ang Imong kamot ug ition ang Imong tudlo, usabon Namong kahimtang.'"

³⁰² Kadtong maantigo nga pundok sa mga relihiyosong panatiko, nagtawag sila kaniadto og pipila ka bantugang edukado nga mga eskolar nga may D.D., Ph.D., miduol Kaniya ug miingon, "Karon, kung ikaw ang Anak sa Dios, giluwag mo ang uban, pero ang imong kaugalingon dili mo mahimong luwason, kanaug dinha sa krus, ug toohan ikaw namo."


³⁰³ Wala sila kahibalo nga ginadayeg na diay nila Siya. Mahimo man Niyang luwason ang Iyang Kaugalingon. Apan kung giluwag pud Niya ang Iyang Kaugalingon, nan wala Niya unta naluwas ang uban. Busa, gitugyan Niya ang Iyang Kaugalingon. Dalaygon ang Iyang Ngalan. Gitugyan Niya ang Iyang Kaugalingon, aron nga maluwas ako ug maluwas kamo. Oh, wala gayu'y sama nga gugma!

³⁰⁴ Dili man Niya kinahanglan nga magkaaduna og sakit. Dili man kinahanglan nga magkaaduna og sakit kadtong bililhon nga lawas nga gipanganak sa ulay. Apan nagkaaduna Siya og sakit, aron nga mahibaloan Niya kung unsaon sa pagpangaliya para kanako kaniadtong nagmasakiton ako.

³⁰⁵ Dili pud Siya kinahanglan nga kapoyon, apan gikapoy Siya. Duna ko'y nabasa nga usa ka hamubong estorya mahitungod niini usa niadto ka higayon, wala ko kabalo kon tinuod ba kadto o dili. "Kaniadtong gibanhaw Niya kadtong batang lalaki

nga taga-Nain, gikan sa mga patay, milingkod kono si Jesus sa usa ka bato ug miagulo tungod sa sakit sa ulo,” tungod kay gikinahanglan man Niyang pas-anon ang atong mga sakit.

³⁰⁶ Gikinahanglan Niyang pas-anon ang atong sala, ug didto namatay Siya, ug didto sa Kalbaryo sa dihang gipataup sa makausa niadtong buyog ug kamatayon ang ikot niini. Nasayod ang si kinsa man, nga pag napataup na sa usa ka buyog ang ikot niini, dili na kini makapamaak pa. Pagmolupad na ang buyog palayo o ang unsa mang insekto nga nagapamaak, pag napataup na niya ang iyang ikot, nan matangtang na sa iyaha ang maong ikot. Usa gihapon siya ka buyog pero wala na siya’y ikot. Ang butang na lang nga iyang mahimo mao ang mohagonghong ug mohimo og daghang kabanha.

³⁰⁷ Mao pud kana ang bugtong butang nga mahimo sa kamatayon nganha sa magtotoo, ang mohimo og daghang kabanha. Apan, alleluyah, dalaygon ang Ngalan sa Ginoo, napataup na Niya ang ikot sa kamatayon diha sa Kaugalingon Niyang unod. Gibuhat kana ni Emmanuel. Nabanhaw, sa ikatulo ka adlaw, gitay-og ang ikot gikan dinha, ug imortal na niining gabhiona. Ug ang Iyang Espiritu ania karon dinhi sulod sa bilding, ug ginapamatud-an Niya Mismo nga buhi Siya sa atong taliwala. Mao kana ang atong Mesias. Mao kana ang atong mapanalanginong Manluluwas. 

MGA HEBREOHANON, KAPITULO DOS ³ CEB57-0828

(Hebrews, Chapter Two ³)

SERYE SA LIBRO SA MGA HEBREOHANON

Kining Mensahe ni Igsoong William Marrion Branham, una giwali sa Ingles niadtong Miyerkules sa gabii, Agosto 28, 1957, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org